

陸氏三子鑒

一
官署



三世醫驗卷之二

習醫鈐法

前明吳興陸

嶽養愚著

子

桂肖愚 孫士龍祖愚輯

盧明銓紹菴發明

石門後學馬珮志敏夫校刊

國朝同郡後學李

沐素軒重訂

鄞縣後學曹炳章亦電詳校

食中脉伏涌瀉消導治驗

二三

許省南忽得暴疾如中風口不能言目不識人四肢不舉蘇合牛黃丸相間而投毫不甦醒一醫投以小續命湯反增喘急身體壯熱手足厥逆舉家驚惶無措醫者以六脉沈微擬用附子理中湯病家求決于余余診其脉兩寸似有似無兩關尺竟無可尋乃由痰氣壅逆而然非不足而沈脫也因謂病家曰此脉乃伏而不見非沈弱也乃從胸按之即眉為之皺按至腹臍體為之舉若有不可忍狀細詢其得病之由病家曰因宴客日間煩冗無暇喫飯至晚陪客畢即發此症予曰飢極過飽此食中也口不能言目不識人脉伏不見皆因飲食填塞清道所致四肢不舉即經所謂土太過令人四肢不舉者也若初起一吐足

了此局矣。今遲延一二日。上中下俱受病。當吐下消導並行。以分殺其勢。乃先生薑淡鹽湯灌而探吐之。涌出痰涎酸水數碗。一時項神思便覺稍清。予診其脉寸關逼逼而來。謂病家曰。無憂矣。又以三棱蓬朮檳榔枳實白豆蔻木香陳皮神麴萊菔子水煎。分消中焦之痞滿。以行中道。又以前藥送潤字丸五錢。下三四行。由是始知人事。能言語。手足頓能運動。再診之。關尺俱見。且沈實有力。胸膈滿悶。按之猶痛。又以前煎方送潤字丸二錢。每日一帖。四日後。按之不痛。方與稀粥。胸膈尚否。時或吐痰。乃以消導二陳湯中。少佐歸芍以養榮。血參朮以扶胃氣。木香白豆蔻以寬其未盡之痞。旬日而復。

盧紹菴曰。脉為氣血之先。中焦為氣血水穀之分。食停中脘。則中焦否塞。痰涎亦因之壅滯。升降之機不運。卒倒類乎中風。其脉亦因之隱伏。他醫乃欲投以參附。病者命未該死。得遇先生診其脉不足。憑問其言不答應。先生乃棄脉從症。按其肚腹。知其為有餘實邪。非不足虛症也。涌其胸膈之痰。而寸關脉應。行其肚腹之積。而尺脉亦應。臨危取勝。殊為高手。原夫攻補兩途。水

火水炭差之毫釐生死立判可不慎哉

過汗灸補治驗二四

丁暮雲于正月間患麻木左手足不能舉惡風或時自汗自用小續命湯服之至十劑諸症不減一醫以為風症宜大汗之小續命雖有汗葯而雜以補養氣血之品故不效耳因倍風藥減白芍人參等味連進二劑汗出如雨反覺一身盡痛或此或彼游走不定并左手足亦不能舉神思昏沈四肢厥逆病家危之予診視陽脉弦細而數陰脉遲濇而且空此症雖似中風然古人謂麻者氣虛也木者血虛也手足不舉者脾虛也有此三虛止宜調養氣血則風症自除小續命湯正以風藥過倍血藥殊少何反倍風藥而去參芍宜其劇矣仲景云大法夏宜汗以陽氣在外也春月陽尚穉初出地下大汗之使衛氣亟奪衛氣失守榮血不隨所以遍身走痛昏沈厥逆皆氣血垂絕之象也急用大料十全大補湯濃煎灌之神氣稍甦又為之灸百會風池肩井曲池間使三里六穴各數壯以防中臟之危自此每日二服而飲食漸進手足漸能運其麻木疼痛亦覺

漸寬。第大便常不通。胸膈痞悶。身體微熱。此汗多津液不足。故大便燥結。下不去。則上不舒。以潤字九五分。日二服。大便通而猶燥。後用八物湯。倍歸地。加麥冬。知母。以潤其燥。少佐檳榔。木香。白豆蔻。以調其氣。自後每燥結。服潤字九五分。甚者一錢。月餘諸症悉愈。

盧紹菴曰。病起于麻木。而後手足不隨。乃是氣虛為本。他醫反以風藥治之。宜其標病益增。非先生卓見棄標從本。不幾殆哉。

少陰在泉。兩尺不應。治驗二五

周兩峯。自省中歸。頭痛身熱。舟由前山漾過。偶風波大作。幾覆其舟。比至家。脇大痛。耳聾。煩渴。謔語。急延一醫診治。值醫來時。忽吐血盈許。醫者進看。見滿地皆血。喘息不定。氣已為病者所奪矣。診脉後。謂病家曰。兩尺不起。寸關弦緊。煩渴謔語。是陽症也。弦乃陰脉。仲景傷寒論曰。陽病見陰脉者死。况兩尺屬腎。乃人之根蒂。今尺脉不起。根蒂已絕。孤陽上越。逼血妄行。症固危險。脉又相應。斷為不治。病家哭拜。懇求用藥。不敢投而去。延予決之。備述前醫之言。及予診視。

吐血已止。喘息已定。診其脉。兩寸闕弦而微數。兩尺果沈而不起。病家問曰。脉果弦否。予曰。脉雖弦。却亦無害。蓋弦數乃少陽本脉。今脇痛耳聾。亦少陽之症。脉症相應。何為就死。又問兩尺果絕否。予曰。兩尺不起。亦自有故。內經曰。南政之歲。少陰在泉。則兩尺不應。今歲己酉。己乃是南政。酉為陽明燥。金司天。少陰君火在泉。故不應耳。吐血者。因舟中驚恐。血菀而神懾。為熱所搏也。謔語者。三陽表症已盡。將傳三陰也。茲且以小柴胡和之。俟實堅而下之。旬日當愈矣。因付二劑。明日脇痛稍愈。耳聾微聞。但仍謔語。胸膈滿悶。舌上薄黃胎。仍以小柴胡加枳桔黃連。日服一劑。二日胸膈少寬。黑胎有刺。大便不行。約七日矣。方以潤字丸三錢。煎湯送下。至夜更衣。身涼。諸症轉失。後去枳桔加歸芍。調理旬日而起。

盧紹菴曰。先正云。不識十二經絡。開口動手便錯。不明五運六氣。徧檢方書。何濟。五行以土為尊。故運氣之中。以土為君位。為南政。其餘金木水火為臣位。為北政。君之所臨。則其脉伏而不應。司天在上。在泉在下。司天應寸。在泉

應尺今南政之歲君火在泉故兩尺不應症有餘而脉不足便斷以為死庸庸者流烏知所謂陰陽五行五運六氣者哉丹溪曰不知易者不足以言太醫今以此症論之先生之學問淵源已令人景仰靡已矣

陰斑溫補治驗 二六

王野溪病傷寒六七日已發表矣忽身熱煩躁口渴咽乾大小便利而不任風寒一醫用涼膈散療之反于胸前見斑數十點色微紅乃以消斑青黛飲殺之又發譫語手足厥逆醫者曰此熱深之故也擬用承氣下之病家疑畏不敢服求決于予予診其脉浮數六七至按之而空曰此陰盛格陽症也下之立斃內經至真要論云病有脉從而病反者何也歧伯曰脉至而從按之不鼓諸陽皆然今脉浮之而數沈之而空正陽虛為陰所拒不能內入而與陰交身熱煩躁口渴咽乾浮陽外越之故也畏風惡寒陽氣不足也發斑者因寒藥撥之不能引火歸原致無根失守之火聚于胸中上薰于肺傳之皮膚而為之耳非內熱發斑倒也譫語者神不守舍也手足厥逆者陽將竭也若冷至肘膝則無及矣

此與李東垣治馮內翰之姪目赤煩渴王海藏之治侯輔之發斑譫語同例用真武一用理中。此先哲已試之成驗。醫者不知取法耳。急用大劑參朮峻以補之。乾薑附子引以回之。麥冬五味斂而收之。甘草芍藥調而和之。濃煎俟冷徐徐服。一日一夜令藥相續不斷。自此三日夜而病勢始減。旬日後少加減之。月餘而後得起。

炳按立法用藥及服法次序後人可法可師

盧紹菴曰外症身熱口渴煩躁發斑。詰語顯是熱症。他醫欲清涼。先生反投溫補。以其脉雖浮數。按之不鼓。故也。非先生精于脉理。孰敢擔當。

傷寒先補後散治驗 二七

吳子玉病發熱頭疼腰痛煩躁口渴無汗。病家知為傷寒。延數醫調治。有主麻黃湯者。有主羌活沖和湯者。予脉之陽部浮數而不甚有力。陰部沈弱而澹。謂衆醫曰。愚意此症此脉是有兩感之象。此重有所用力。兼之房室而得者。不可輕汗。宜先投補劑。托住其氣血。待日期而汗之。衆醫曰。太陽症而用補。仲景有此治法乎。予曰。仲景雖無此治法。而未嘗無此論。太陽症宜汗。假令尺中遲不

可發汗。何以知之。以榮氣不足。血少故也。今病寸脉浮數而無力。表症不甚急。尺脉沈弱而濇。則裏虛可知。傷寒有失汗而傳裏者。亦有誤汗而傳裏者。此症是矣。衆猶未曉。病家泥于傷寒忌補之說。姑從羗活冲和湯服之一日夜二劑。前症俱劇。仍不得汗。擬麻黃者。以藥輕病重之故。欲大汗之。病家再求決于予。予曰。若服麻黃湯。亡陽詬語之症即見。斃可立而俟也。病家不敢投。予用補氣養榮湯二劑。彼醫後議曰。表症投補。後日熱邪傳裏。大黃又讓他用。家用醫只論名重。有時運大率如此。服後諸病未減。亦不劇。又延予診之。寸關如故。兩尺稍有神。再用前湯二劑。又約一日夜。方以參蘇飲微汗之。汗後諸症悉愈矣。病家謂彼醫曰。名不虛傳。君謂投補。必有承氣之患。今竟何如耶。後每遇稱服不敢妄議。

盧紹菴曰。傷寒病。服麻黃湯三劑而汗不出者。死。津絕故也。必元氣固而能蒸發津液為汗。表症宜汗。而尺脉匿者。須先補托其元氣。而後發表。先賢之議論具在。庸工目中。未嘗覩及。反妄加嘲訕。迨至先生治驗。羣衆始報顏懾。

服遲矣晚矣。

傷寒畜血治驗二八

凌東陽患傷寒已經汗下身體外不熱而以手捫之熱極飲食不進胃中飢餓不能忍及強食稀粥胃脘即脹疼不能當須人用力揉之待一二時始下大腹甫下即又飢不能支持大便五六日不行而少腹不鞭滿數日間醫者以汗下身涼大約用開胃養血順氣之藥出入加減而病覺日甚一日病人自分不起延予商治予診之兩寸關浮數兩尺沈數有力曰此畜血症也因下之太早濁垢雖去邪熱尚留內無濁垢之結燥致血結成瘀胃中飢甚者火也食即脹者邪熱不殺穀也揉下仍飢者胃中空涸邪熱尚在也法宜清上焦之熱去下焦之瘀而後徐議補在座醫者曰許學士謂血在上則喜忘血在下則發狂今有瘀血何以無此症也予曰成無已固深於傷寒者也謂不大便六七日之際無喜忘如狂之症又無少腹鞭滿之候何以知其有畜血蓋以脉浮故也浮則熱客于氣數則熱客于血下後浮數俱去則病已如數去而浮仍在則邪獨留于

衛善飢而不殺穀潮熱及渴也浮去而數仍在則邪獨留于榮血熱下行血得泄必便膿血若大便六七日不行血不得泄必畜在下焦而為瘀須以抵當湯下之此前賢之成案也衆醫語塞乃用淡鹽湯急送抵當丸三錢取鹹走血之意以去榮中之結熱隨濃煎人參湯調涼膈散五錢徐徐送下以去衛中之浮熱用人參湯者病久數下恐元氣不能支也如此兩日結血去浮熱解飲食漸進後以清氣養榮湯調理旬日而愈

盧紹菴曰畜血之症最難辨識先正雖云畜之在上則喜忘畜之在下則如狂然狂易于識認以其顯形于外也若忘則隱默于內誰人識得凌君汗下後而成前項諸症若非先生辨別精確疇能識其肇病之因乃用抵當丸祛下焦之畜結涼膈散清上焦之浮熱而上下之邪既去恐元氣由茲而虛脫又以參湯以固其本先之以誅伐繼之以撫循有制之兵動無不勝

傷寒通因通用治驗 二九

湯二老病傷寒已發汗矣後忽下利身熱頭微痛神思昏憤一醫認為合病下

利復用解肌發表藥病反增劇有汗惡風後易一醫認為陰虛用理中合四物投之遂徹夜不寐妄有所見躁煩詎語一醫云此協熱下利也用白頭翁湯二劑後病勢略可數日諸症不減四肢厥逆病家急甚予診其脉浮按散大而數沉按細數而有力曰向云協熱者是也第宜調胃承氣湯下之不當止用白頭翁湯耳坐中適有一醫云下利厥逆可復下乎予曰內經云塞因塞用通因通用王太僕曰大熱內結淫瀉不止熱宜寒療結復須除以寒藥下之結散利止此通因通用之法也彼醫云恐非仲景法予曰仲景深于內經者也仲景云下利詎語有躁屎也厥逆者熱深厥亦深也承氣下之此正仲景法也又何疑哉第此症初見時下之即愈今日數已久元氣將脫不得竟下因用人參二錢濃煎送潤字丸五錢是時日將晚矣夜半出躁屎數十枚清晨利減十分之五手足稍溫第沈昏更甚問之不語病家又危之診左脉微浮略數右脉少沈微數無力予曰不足憂也又用人參五錢濃煎送潤字丸二錢日中又出躁屎數枚溏便少許薄暮大便不行問之能語索食稀粥與之是夜不服藥進糊粥二蓋

明早身涼神思清爽。此後用調養氣血之藥少佐以清熱之品。旬日諸症悉去。第大便常燥結。用八物倍生地調理月餘而如故。

盧紹菴曰。傷寒得汗。表症已除。忽而下利。熱邪傳裡。俟其痞滿燥實四者兼全。然後議下。斯治法之正也。庸工妄投湯藥。病邪增劇。然而下症仍具。法須推蕩。但為日已久。元氣虛憊。乃以參湯送潤字丸。正虛不足。則用人參培助。邪寔有餘。則用潤字丸驅逐。病家甚是急迫。先生處之裕如此等方法。大開後人茅塞。

過汗變症治驗 三十

陳雲谷之子。年十四歲。四月中旬。自館中回家。偶戲水傍。一人在後懾之曰。師來因驚而手撲于水頭。面俱濕。僅身不落水耳。走歸。夜卧。身發熱。頭苦痛。至清晨煩躁不安。胡言亂語。及問之。欲言而不能出聲。彼家延兒醫視之。謂六脉浮緊。此傷寒症也。表氣鬱冒。以致裡氣不舒。故煩亂。宜大汗之用。五積散。令密室重覆。汗出透衾。明日手足搖擲。項背強直。氣出不納。自汗不語。更兒醫數人。惟

炳章按汗即
血也汗多則
傷陰肝失所
養故變為癰
今反以為亡
陽故泥於大
說也

投抱龍丸鈎藤散驚風之藥不得少效醫者束手病家悲號始以予非兒科故
不延治其族叔陳少塘曰醫顧明理何如耳何論大小因求療于余診其兩寸
浮數而散關尺沈弱而濇此症初起本因驚恐傷其肝腎二經之氣分內經曰
驚則氣亂胡言亂語氣亂故也問之語不能出聲者氣下故也此時以平肝鎮
心之中少佐以壯氣血之藥病當自愈乃誤認為傷寒而發其汗汗多則亡陽
變而為瘧強直搐搦蓋瘧症也內經曰陽氣者精則養神柔則養精今陽氣竭
血無所附以養筋故不柔和也陽氣盡浮于外故氣不納而自汗不語者內之
元陽將盡急用大料參芪為君以救垂絕之陽歸芎天麻生地為臣以養肝經
之血白芍酸棗仁五味為佐以收耗散之心神生甘草麥冬為使生津液以徹
浮游之火二劑諸症頓減復以硃砂安神丸間服之旬日而如故
盧紹菴曰瘧症項強搐搦角弓反張謂肩臂着席肚腹疊起而高腰脊反空
空如橋先正云大發濕家汗則成瘧此子雖仆于水僅沾頭面是驚為主而
非濕症也庸工大汗之謬矣非先生之卓識決然不起

表邪先補後汗治驗三一

邱全谷年正方剛。九月間。忽身微熱。頭微痛。心神恍惚。有時似夢非夢。自言自語。延醫療治。因頭痛身熱。此輕傷寒也。當發散之。服發散藥二劑。服後汗不出。而身熱反甚。妄言見鬼。醫者因無汗。欲再發散。病家疑不可復表。又延一醫商之。因妄言見鬼。謂熱已傳裡。欲下之。而大便之去未久。兩醫不能自決。求決于予。予脉之。輕按浮數。而微重按濇而弱。微數者。陽氣不足也。濇弱者。陰血不足也。此陰陽俱虛之候。不可汗。尤不可下。主表者曰。汗既不出。何謂陽虛。予曰。此症雖有外邪。因內損之極。氣餒不能逼邪外出。而作汗法。當補其正氣。則汗自得。而邪自去矣。若再發之。徒竭其陽。而手足厥逆之症見矣。其主下者曰。仲景云。身熱譫語者。有燥屎也。何可不下。予曰。公知其一。不知其二。內經曰。譫語者。氣虛獨言。此症初止。自言自語。因發散之藥重虛其陽。所以妄言見鬼。即難經所謂脫陽者。見鬼也。王海藏曰。傷寒之脉浮之損小。沈之損小。或時悲笑。或時太息。語言錯亂。失次。世疑作譫語狂言者。非也。神不守舍。且遂用補中益氣湯。

加附子薑棗煎服一日二劑至晚汗濺濺而來清晨身竟涼頭不痛第人事尚未甚清予曰陽氣稍復陰氣未至耳仍以前湯吞六味丸旬日猶未見精采調理月餘乃愈蓋因此人房室之後而繼以勞力也

盧紹菴曰房勞感冒須于補劑之中畧加表散可也却大汗之房勞既虛其陰大汗又虛其陽宜其有以上諸症昧者不識又欲妄施汗下微先生豈不殆哉

壯水之主以制陽光治驗 三二

姚明水天稟素弱神雖有餘精實不足脾腎兩虛遠色慾節飲食少年謹慎未有如彼者三十歲前每患脾泄參苓白朮散常不徹口病發時必用附桂方愈三十歲後脾胃甚好善啖自恃強壯生平謹守一旦改操且因無子置妾初患齒痛口舌痛以涼膈散數錢服之即愈自此常發常服至半年後滿口腐爛飲食不進涼藥愈投愈劇予診其脉兩寸浮數而微關尺浮弱而濇曰兄形雖有餘精仍不足當嚴守禁忌服溫補藥涼劑不可再投矣用八物湯倍地黃以峻

補腎水。加桂附各一分。引火歸原。正所謂折之不去。求其屬以裒之也。煎就涼服。不使與上焦之虛熱爭也。十劑其患如失。後不復發。

盧紹菴曰。人生三十歲以前。精神日漸旺盛。三十歲以後。精神日漸衰微。此君稟賦薄弱。而乃娶艾妻于中年之後。宜其水衰而火盛也。先正曰。實火可瀉。虛火宜補。今先生滋腎以制火。非深明內經之旨。孰能臻斯效乎。

小兒疳痢清升並用治驗

三三

姚明水暮年生子。甫止一歲。其母無乳。乃以餅糕棗柿哺之。遂患疳積痢。上則口舌時常腐爛。下則膿血相雜。兒醫治療。自春徂秋。肉削如柴。飲食少進。明水憂煩過度。身不爽快。邀予診視。適值兒醫先進。看畢。出覆明水曰。令郎似不可救。上疳下痢。睡不閉目。肛門如竹筒。手指紋已過命關。如之奈何。明水曰。自家也顧不得。是亦數也。為之垂淚。兒醫遂別。予謂明水曰。何不令予視之。答曰。因老先生非小兒科。故不敢勞耳。急令人引視。予看此兒。有死形而無死神。以一指按其脉。上浮數而微下。沈微而數。及看其肛門。似外脫而非竹筒也。謂明水曰。